


**CACHET APTEEK**  
**PLUS**  
 U Plus Aptek  
**TOMSTRAAT 92**  
**Tel. 4201**  
 Groot genoeg om u te dien, klein genoeg om u te ken

**die WAPPAD**  
 IN U LIG SIEN ONS DIE LIG  
 ASPU  
 AMPTELIKE STUDENTEKOERANT VAN DIE P.U. vir C.H.O.  
**JAARGANG XXXIV**      **NOMMER 9**      **30 MAART 1979**

**TOPS**  
 Uitsig Deurloop  
 Tel. 21112  
 VIR: Rekenaars  
 Witjasse  
 Dissekteerstelle  
 \* \* \* \* \*  
 Skoonheidsmiddels  
 \* \* \* \* \*  
 Geskenke



# SACLA HET

Mnr. Vusi Khanyile het 'n vergadering van SACLA op 26 Maart toegesprek.

## BESTAANSREG

Mnr Vusi Khanyile het belangstellendes in SACLA op Maandag, 26 Maart oor die doel en ontstaan van SACLA toegesprek.

Mnr. Pieter Fanoy het die vergadering geopen. Mnr Plet Fourie, voorsitter van die kampuskomitee, het mnr.

Khanyile aan die woord gestel en inleidend oor SACLA gepraat. 'n Konferensie van Chris-

tene van verskillende rasse en volke is in 1976 in Nairobi gehou. Op die konferensie is oor 'n versoening van wit en swart Christene in Suid-Afrika besin.

Een swartman het gesê, "I hate South African Whites." Prof. Dawid Bosch het gesê hy praat as ambassadeur van Christus en nie as blanke Afrikaner nie. Volgens mnr. Khanyile was dit moontlik om die "presence of God" te kan sien.

Ná ses maande is besluit om 'n konferensie in Suid-Afrika te hou. Dit sal tussen 8 en 15 Julie in Pretoria plaasvind en voorsorg sal getref word sodat dit nie op 'n politieke geredekawel uitloop nie. Daar sal tot geen konsensus aan die einde gekom word nie.

Daar word vyf afsonderlike konferensies gehou: die eerste is vir politieke en burgerlike leiers, die tweede vir kerkleiers, die derde vir universiteite, die vierde vir hoërskoolleerlinge en die vyfde is vir jeugleiers van verskillende kerke.

Volgens prof. Elaine Botha, hoogleraar in Kultuurkunde aan die PU vir CHO, is dit definitief nodig dat daar studente van die PU na hierdie konferensie moet gaan.

## STUDENTEPARLEMENT BESLUIT OOR OOP UNIVERSITEITE

Die Studenteparlement het op Donderdag, 22 Maart weer gesit. Die onderwerp van bespreking was of oop universiteite ingestel moet word al dan nie.

Die onderwerp is onder drie hoofde bespreek: eersens of daar werklik 'n behoefte aan oop universiteite is, tweedens of dit die akademiese standaard van die universiteit sal beïnvloed en derdens die feit dat die PU die enigste universiteit is waar Christelike onderwys onderlig word.

Mnr. H. Vermeulen was die inleier van die standpunt vir oop universiteite. Daar is gestel dat Christenskap nie eksklusief is nie en dat dit ons

plig is om anderskleuriges dieselfde Christelike opleiding as ons te gun.

Mnr. C. Kraamwinkel was die inleier van die standpunt teen oop universiteite. Hy het veral klem gelê op die feit dat oop universiteite in die praktyk nie so goed soos in die teorie sal werk nie.

Ná die stemming was die uitslag gelykop, maar nadat die Speaker sy stem uitbring het, het die standpunt vir oop universiteite gewen.

## 1979 se Sjampanjenooi



1979 se sjampanje-nooientjie - Sandra Kruger van Karlien.

# Drie termynne bevoordeel dienspligtiges

Die beplande ondersoek na die wenslikheid van 'n drietermynstelsel vir universiteite, is geïnisieer deur Prof. Roux de Villiers, dekaan van die Ingenieursfakulteit aan die Universiteit van Stellenbosch.

Hierdie stelsel is gemik op die beter benutting van mannekrag en bestaande fasiliteite aan universiteite en sal ook noemenswaardige voordele vir militêre dienspligtiges inhou, aangesien akademiese en praktiese opleiding met militêre opleiding geïntegreer sal kan word.

Prof. De Villiers stel drie sestienweek-termynne met een tot twee weke vakansie

tussenin as moontlike alternatief vir die huidige stelsel. Om 'n kursus binne die vasgestelde tyd te voltooi, moet 'n student twee termynkurse binne een jaar aflê. Vir 'n driejaarsgraad word ses termynkurse dus vereis, wat, indien dit met 'n verdere ses termynne militêre opleiding geïntegreer word tot gevolg sal hê dat 'n dienspligtige sy graadopleiding en militêre opleiding binne vier in plaas van vyf

jaar kan voltooi.

Vergeleke met die huidige stelsel hou die drietermynstelsel die volgende voordele in: Ongeveer 50 persent meer studente kan geakkommodeer word aangesien universiteite twee maal per jaar studente kan inneem. Dit sal lei tot 'n vermeerdering van doserende personeel wat op hul beurt meer tyd sal hê vir navorsing omdat hulle een termyn per jaar vry sal wees. Studente sal die geleentheid

hê om praktiese ondervinding gedurende hulle studietyd op te doen en terselfertyd 'n bydrae tot die arbeidsmark te lewer. Hulle sal ook 'n jaar vroeër tot die mark kan toetree. Die moontlikheid word geskep dat studente hulleself finansiële kan onderhou.

Vir studente wat nie ander verpligtinge het nie, sal dit moontlik wees om hulle kurse in minder as die vasgestelde tyd te voltooi.

Enkele probleem-punte waarop gewys kan word, is;

die feit dat die huidige akademiese semester met vier dae ingekort sal word; die vermoeidheidsfaktor aangesien daar nie kort vakansies gedurende die semester sal wees nie; die invloed op die funksionering van studenteliggamte en die sinchronisasie van universiteit- en skoolvakansies.

Alhoewel die ondersoek nog in die begin stadium verkeer, is daar baie entoesiasme voor en admiraal Edwards van die Suid-Afrikaanse Weermag het

reeds te kenne gegee dat hulle te vinde sal wees vir so 'n stelsel.

Aspekte wat egter nog ondersoek vereis, is die implikasies wat so 'n stelsel vir universiteite en die land as geheel sal hê.

Prof de Villiers meen voorts dat, indien hierdie gedagte nie prakties uitvoerbaar is nie, universiteite tog ernstig sal moet besin oor die effektiewe benutting van fasiliteite, mannekrag en studentetyd.



# ZIJ HEBBEN GEZEGD

## Swart-witmag met redes verwyder

Volgens mnr. Theuns Eloff het die dagbestuur van die SSR goeie rede gehad vir die afhaal van die Swartmag-witmagvoorstelling in die duikweg. Hierdie motiverings is nie gegrond op die onderdrukking van die inisiatief van studente nie.

Die eerste rede is gebaseer op gegronde klagtes dat die simboliek van hierdie voorstelling 'n rassistiese ondertoon het wat mense aanstoot gee.

Tweedens is dit ongelukkig so dat 'n groot deel van die Pukmassa politie nie volwasse genoeg is om so 'n simboliese voorstelling in perspektief te sien nie. Dit geld ook vir sekere swart personeel wat aan die PU werk-saam is.

Volgens die mosie wat in hierdie verband deur die dagbestuur van die SSR aanvaar is, was dit nie die "plek of manier om deur middel

van skoktaktiek oor politieke aangeleenthede te besin nie."

Derdens was daar organisatoriese probleme rondom die toestemming, al dan nie, om enige prent op die duikweg te teken.

Op 'n vorige SSR-vergadering is ook 'n beginselbesluit geneem dat die SSR die skilder of teken van prente in die duikweg op eie inisiatief nie in beginsel afkeur nie mits die prente na hulle mening netjies, smaakvol en nie-aanstootlik is nie. Die reg word egter voorbehou om sulke prente af te keur en te laat verwyder.

### Kleredragreëls gepropageer

Die SR wil opnuut graag die kleredragreëls van die PU wat op welvoeglikheid en netheid gebaseer is onder die aandag van die studente bring. Die reëls is by die prims verkrygbaar. Hulle sal ook weer die reëls onder die aandag van die studente bring.

# KLEREDRAGREËLS NIE STRENG TOEGEPAS

In 'n meningsopname oor die kleredragregulasies het dit geblyk dat die studente in die algemeen nie klagtes daaroor het nie, solank dit net nie te streng toegepas word nie.

Volgens prof. G.N. van den Bergh, voorsitter van die advieskomitee oor studentevorkoms aan die Rektor, word die regulasies nóg deur dosente, nóg deur studenteraadslede konsekwent toegepas. Hy het daarop gewys dat die SSR onderneem het om hierdie taak uit te voer.

In sekere klasse word die reëls deur tot vyftig persent van die studente oortree, en ongeveer vyftien tot twintig persent van die studente maak hulle daagliks skuldig aan oortreding van die reëls.

Alle reëls is gegrond op netheid en skep eenvormigheid in die konsekwente toepassing daarvan.

Dit is prof. van den Bergh se indruk dat sowel die

Senaat as die SSR enige oortreding goedsmoeds aanvaar omdat hulle konfrontasie met die studente wil vermy. "Dit is bejammerenswaardig dat die mense wat die regulasies moet toepas, te slap is om dit te doen", het hy gesê.

Volgens mnr. Theuns Eloff word die regulasies redelik streng nagekom. Sy klagtes is dat mansstudente se denimbroeke vuil en verbleik is, en dat sommige verslete sportskoene dra. Hier en daar is daar 'n dame wat beter sal lyk met haar huidige langbroek nadat sy tien kilogram verloor het. Die regulasies bied genoeg geleentheid om eie smaak en die mode na te volg.

Mnr. Steinman de Bruyn sê dat studente baie positief op vorige versoeke ten opsigte van kleredrag gereageer het. Dit is te betwyfel of die minder netjiese studente netheid deur middel van die reëls sal aanleer. Alhoewel dit vermy behoort te word, sal persone wat aanhoudend oortree, optrede teen hulle uitlok.

Volgens mnr. Siegfried Eiselen is kleredragregulasies nie werklik nodig nie, omdat die meeste studente hulle in elk geval só klee dat daar geen fout mee gevind kan word nie. Dit is egter nodig om regulasies te hê sodat dit toegepas kan word as dit nodig is.

Mnr. André van der Walt is van mening dat kleredragregulasies irrelevant, onbelangrik en onnodig is. Daar moet egter 'n Universiteitsregulasie wees wat vereis dat studente netjies moet lyk. Dosente moet hierdie reël na eie goeie denke in die klas toepas, en studenteraadslede moet sorg vir die uit-

voering van die reël op die kampus.

Mnr. Kobus Viljoen glo nie in 'n kleredragreglement nie. Mnr. Louw van Biljon en mej. Coenie van Rheede van Oudtshoorn stem saam oor die belaglikheid en onnodigheid van kleredragreëls. Hulle voel dat dit 'n persoonlike aangeleentheid is.

Mnr. Pinda van Vreden sê die kleredragreëls word redelik goed nagekom, en dat mans nie sommer in 'n T-hempie en 'n denimbroek sal klasdraf nie. Alhoewel daar nie eintlik kontrole is nie, word die reëls volgens hom tog goed genoeg toegepas.

Mej. Rolene Koch voel dat studente oud genoeg is om self oor hulle kleredrag te besluit. Volgens haar dwing die PU kleredragreëls af om 'n goeie beeld na buite uit te dra. Die reëls is veral vir die mans baie streng, en sy vind dit belaglik dat mansdosente en eerstejaarmans dieselfde kleredragreëls moet nakom.

Mej. Ziets de Kock glo dat die modes miskien besig is om te verander en meer netheid in die hand te werk. Mans dra hulle hare nou korter, terwyl damesmodes na meer elegansie as ooit tevore neig.

Volgens mej. Estelle Oosthuizen kan sy na haar eie smaak aantrek sonder om die reëls te oortree. Sy vind dit onregverdig dat die reëls nie deur alle departemente konsekwent toegepas word nie. Mnr. Daan Bakker sê dat daar gerus weggedoen kan word met Engelse tradisies. Hy dink hier veral daaraan dat baadjies met Sondagmiddagetes gedra moet word, hoewel dit tog uitgetrek word.

(Sien ook Zij hebben gezegd)

# KORPSEL KARLIEN BESIN OOR STUDENTEHUWELIKE

Mauritz Moolman sê dit is goed om saam swaar te kry en saam te werk aan sukses in die huwelik. Hy sê daar moet saam gewerk word, want in die huwelik is die twee individue saamgeheg tot 'n eenheid. Albei moet help om die finansiële probleme te oorbrug. Mauritz sê getroudes bly goedkoper as twee sleepers in 'n koshuis. Hy het tydens 'n Korpselaksie op 13 Maart in Karlien gepraat.

Herlinde van der Walt, ook getroud, meen een van die twee getroudes moet ook werk. Die paartjie se finansies moet so wees dat hulle selfstandig vir hulself kan sorg. Mevrou Hansie Malan wat self getroude kinders het, sê ouers kan darem altyd help as daar werklik probleme is.

Volgens Herlinde is 'n studentehuwelik volwasseheid, veral met betrekking tot die studie-aspek. Nico

Pieterse, 'n ongetroude student, sê die probleme wat in die huwelik opduik, moet op 'n verstandige wyse die hoof gebied word. Nico glo hulle leer mekaar nog beter ken en hulle groei nader aan mekaar. Die twee moet volwasse genoeg wees om mekaar met foute en al te aanvaar voordat die probleemoplossing geslaagd sal wees. Meneer Sarel Pieterse, 'n ongetroude student, voel dat enige twee studente wat

dit enigsins oorweeg om in die huwelik te tree, geestelik volwasse moet wees. Hy sê die woord "volwassenheid" is 'n relatiewe begrip.

Herlinde sê egter as twee maats mekaar gevind het en tot die besef gekom het dat dit so deur God beskik is, bied die huwelik die grootste kans tot sukses. Die huwelik is 'n instelling van God en dit sal altyd so wees. Mauritz sê die woorde liefde en respek is twee belangrike woorde in enige huwelik. Volgens hom is die huwelik die hoogtepunt van liefde.

Mauritz en Herlinde sê proefhuwelikke is taboe. Nico meen in 'n proefhuwelik lyk dit asof niemand verantwoordelikheid wil aanvaar nie. Daar heers in 'n proefhuwelik 'n toestand van ongebondenheid, terwyl die mens juis gebonde wil wees. Mev. Malan sê in 'n proefhuwelik kan enigeen sy goed vat en loop. Dit kan nie toege laat word nie. Daar word 'n meer volwasse optrede vereis.

Volgens Herlinde is dit kinderagtig om oor enige

beuselagtigheid te wil skei. Sy sê as twee persone werklik vir mekaar bedoel is en bereid is om dinge op te offer, behoort die huwelik te slaag. 'n Proefhuwelik is glad nie nodig nie.

Herlinde en Mauritz sê dit is wenslik dat daar nie kinders in die studentehuwelik moet wees nie. Dit is nie verkragting van God se kultuur-opdrag nie, want daarmee saam het die mens 'n verantwoordelike besef gekry.

'n Studentehuwelik het net soveel kans tot sukses as enige ander huwelik, volgens mev. Malan. Studie- en finansiële probleme is geen rede waarom dit nie kan slaag nie. 'n Studentehuwelik is nie aan meer of minder kritieke probleme blootgestel nie - die aard van die probleme verskil net van dié van 'n ander huwelik.

Die kwessie is net: 'n huwelik is vir ewig; studentwees, ongebonde wees, om jonk te wees, is kortstondig. Daar word gevra of dit nie deesdae mode geword het om vanaf die kampus te trou nie.

## KORPSTEMA IS ONCHRISTELIK AS STELLING

Prof. dr. A. König, professor in Dogmatiek by Unisa, het Woensdag 7 Maart met die opening van die Korps-werk-saamhede gesê die tema vir vanjaar - Die Toekoms: Alles tevergeefs? - is as stelling onchristelik. Hy sê die hele Evangelie is toekomsgerig. "Die Here het in die Ou Testament reeds sy volk Israel op die toekoms gerig."

Anders as ander natuurvolke het Israel 'n toekoms-

denkriktig ontwikkel. "In die Nuwe Testament", sê prof. König, "word die beloftes in die Ou Testament deur Matteus as geloofsdaad op Christus toegepas - dan wys Christus weer die toekoms in. Christus is dus die teenoorgestelde van "Alles tevergeefs" en wel self die toekoms.

Prof. König het gevra of die tema 'n realistiese vraag is. Verwysende daarna dat die mens op die oomblik te make het met 'n kultuurnood, het hy afgelei dat die mens self vir die resultate van mensgemaakte probleme moet instaan - probleme soos kernwapens, uitgeputte energiebronne, oorbevolking, besoedeling en dan ook ekonomiese groei waarin die probleem lê dat die mens daarsonder nie kan klaarkom nie. Daar kan dus met reg gevra word of daar nog 'n toekoms is - dit is dus 'n realistiese vraag.

## Kultuurraad vergader

Mnr. Frikkie van Niekerk is Woensdagaand, 21 Maart eenparig genomineer as voorsitter van die Kultuurraad. Die vorige voorsitter, mnr. Jan van Deventer, het op 12 Maart bedank.

Op die vergadering is tydelike patronaatskap aan die Kitaarvereniging toegestaan, totdat hulle finansies en huishoudelike reglement in orde is.

Aster is ook onder die Kultuurraad gepatroneer omdat die Administratiewe Raad ontbind het.

Die vier toerliggame, Alabama, Thalia, PU-koor, en Montium gaan onder andere in Transvaal, die Boland, Wes-Kaap, Oos-Transvaal en Noord-Natal toer.

Nominasies vir 'n nuwe onder-voorsitter is ingewag tot 28 Maart. Die verkiesing sal tussen 13h30 en 14h00 op Woensdag, 4 April, plaasvind.

Mnr. Petri de Kock, voorsitter van SGD.

## SGD VORDER VINNIG



'n Groot deel van die SGD-vergadering wat op 20 Maart gehou is, is aan reklame en skakeling toegewy.

SGD beoog om die gemeenskappe waar hy sal dien, in te lig oor die aard van hierdie studentediens om effektiwiteit te bewerkstellig. Hierdie reklame sal kontak en skakeling met bestaande organisasies in die gemeenskappe tot gevolg hê. Die ondervinding van staatsdepartemente sal ook gebruik word nadat met hulle geskakel is.

Die SGD is 'n merkwaardige idee wat vergestalt kon word danksy die dinamiese medewerking van studente soos mnr. Petri de Kock, voorsitter van SGD.

Op die beheerkomitee-vergadering het studente en dosente saam oor praktiese reëlings besluit en komitees aangewys om hierdie reëlings te help uitvoer.

'n Komitee bestaande uit mnr. Ig Vorster en Piet Mas-syn moet die wetlike aspekte en implikasies vir die SGD as welsynsorganisasie ondersoek. 'n Ander komitee waarop Dr. D.J. Eloff dien, ondersoek die finansiële aspekte van SGD.

## Muskadelfees - nog plek

Daar is nog plek vir sowel mans as dames op die bus na die Montagu Muskadelfees.

Die fees word op 20 en 21 April gehou. Die gelde bedra ongeveer R32 en is by bespreking by mnr. Piet Joubert betaalbaar. Die bus sal reeds Donderdagaand 19 April vertrek.

## DOODVERF BETREUR

'n Mosie in verband met die Swartmag - witmagvoorstelling in die duikweg is op die laaste vergadering deur Politiese Raad met 'n tweederde meerderheid aange-neem.

Dit behels onder meer die volgende: Die besluit van die SSR om die uiters treffende voorstelling in die duikweg dood te verf word betreur. Dit onderdruk nie alleen studenteinisiatief nie, nou ook deur middel van skoktaktiek, oor politieke aangeleenthede te besin. Twee lede het buite stemming gebly. (Sien ook Zij hebben gezegd).



# Affikampus

INTER UNIVERSITÊRE  
REDAKSIE

## NUSAS-kongres glo sukcesvolste

Die 56ste NUSAS-kongres wat gedurende November 1978 op die kampus van die Universiteit van Kaapstad gehou is, was een van die mees suksesvolle en bes bygewoonde kongresse wat nog ooit gehou is, volgens 'n berig in Rodeo.

Die openingsrede is deur professor Peter Horn van die Duitse Departement van die Universiteit van Kaapstad gehou. Hy het die Suid-Afrikaanse Universiteite gewaarsku dat, tensy hulle 'n manier vind om deur die isolasie wat deur die apartheidsbeleid op hulle afgedwing word te breek, die grade wat hulle toeken, waardeloos is. Hy het ook gepleit vir die inskrywing van swart studente by Suid-Afrikaanse universiteite wat getalgegewys meer in verhouding moet wees met die algehele bevolkingsyfers en nie slegs 'n paar "token" swartes om ons gewetens te sus nie.

Verder is 'n mosie ingedien waarin die Regering versoek word om die reg van die individu te erken sodat hy vir homself kan besluit of hy militêre diensplig wil doen al dan nie. Daar is ook aan die hand gedoen dat nasionale dienspligtiges toegelaat word om in nie-militêre hoedanighede diens te doen.

Die Universiteit van Kaapstad se Vroue-Beweging het uit die kongres gestap op grond van NUSAS se gebrek aan betrokkenheid by feministiese beginsels. Daarna het die kongres 'n verslag aangeneem waarin die versuim van NUSAS om feministiese oogmerke te integreer, erken is.

'n Beroep is op sekere NUSAS-lede gedoen om hulle weelderige leefwyse te verander. 'n Mosie is aanvaar waarin gesê word dat duur klere, motors, nagklubs en restaurante nie versoenbaar is met NUSAS se politieke beginsels nie.

Edwin Angless, 'n afgevaardigde van die Universiteit van Kaapstad, het 'n stukkie sogenaamde "guerilla theatre" opgevoer waarin hy die ontbinding van NUSAS en die stigting van 'n "African People's Organization" bepleit het. Die NUSAS-leiers het, na verneem word, met afgryse na die voorstelle geluister. Alles was egter 'n grap en na die tyd is die NUSAS-leiers baie lof toegeswaai vir hulle reaksie en optrede.

Die  
Wapad  
word gedruk  
deur  
PROMEDIA

## Affikampus flitse

● Tydens die eerste ASPU-konferensie vanjaar wat op 2 en 3 Februarie 1979 op die RAU-kampus aangebied is, is:

\* Trek, TUKS se Studentejaarblad, as wenner van die ASPU-jaarbladkompetisie vir 1977 en 1978 aangewys.

\* IRAWA, Kopsies se kampuskoerant bekroon as die beste kampuskoerant. Die Perdeby van UP en Die Wapad van die PU was onderskeidelik tweede en derde.

● RAU het hom ten gunste van aansluiting by Brian Hack, konserwatiewe SR-lid van die Universiteit van Kaapstad, se voorgestelde "Conservative Students Alliance" (C.S.A.) uitgespreek.

● Aucklandpark se straatname gaan moontlik verander word om 'n beter studente-atmosfeer oom die universiteit te skep. Daar is voorgestel dat Ripleyweg verander word tot Fakulteitsweg en Diltonlaan tot Kanselierslaan. Die reaksie van die inwoners van Aucklandpark wissel van baie positief tot baie negatief. Die grootste beswaar wat geopper word, is die administratiewe beslommernis wat met die adresveranderings gepaard gaan, berig die HeRAU.

● Die NUSAS-president, mnr. Auret van Heerden van die Universiteit van Kaapstad, het die CSA verwerp, aangesien hy die mening toegedaan is dat een studentelggzaam onmoontlik sowel Engelse, Afrikaanse en Swart studente kan verteenwoordig, omdat die drie groepe so uiteenlopend is.




Mnr Theuns Eloff (heel regs) in gesellige luim saam met v.l.n.r. Hilary Joffe, Clifford Goldsmith (Wits se SSR-voorsitter), Dan Roodt en 'n vriend, tydens mnr. Eloff se onlangse besoek aan Wits waartydens mnr. Eloff 'n massavergadering oor die Afrikaanse student, sy rol, houding en posisie in die samelewing toegesprek het. Die goeie gees en welwillendheid waarin besoek verloop het word duidelik deur die foto weerspleël.

## SKAKELING

Verdere skakeling tussen kampsusse - veral NUSAS- en ASB-kampsusse sal in die toekoms gekoördineer word deur meneer Clifford Goldsmith van Wits. Alle inligting oor besoeke van studente-leiers en -verenigings moet aan hom gestuur word. Hy sal dan met die naaste universiteit skakel en die toergroep laat weet in verband met skakelgeleenthede.

# Die Student se Bank.



## As student is jy voor in ons boek.

Kyk net na ons  
dienste vir  
studente:

Spaarrekeninge  
Laekostetjekrekeninge  
Versekering  
'n Studentesakebestuurder  
wat jou taal praat.  
Kom gesels gerus met ons.

Daar steek meer in bankwese by die Professionele Mense.

Barclays-Nasionale Bank Beperk  
Geregistreerde Handelsbank



**BARCLAYS**



# die WAPAD

## AKADEMIESE JAAR VERANDER DALK

'n Mens wil byna sê: "uiteindelik!" Iemand het gaan sit en dink en wat meer is 'n oplossing, of dan 'n amperse oplossing, gekry vir die huidige probleme met die benutting van die akademiese jaar en die ledige tyd wat dienspligtiges soms in die leer ondervind. Die voorstelle van prof. Roux de Villiers lui dat die akademiese jaar in drie termyne verdeel word en dat slegs twee kursusse in een jaar voltooi hoef te word. Ses kursusse is gelyk aan een drie jaar graad. Dienspligtiges moet dan ses kursusse (of termyne) ook doen en kan dan die twaalf kursusse saam in vier jaar doen (drie per jaar).

Die skema kan baie voordele vir die dienspligtige inhoud. 'n Mens hoor so dikwels dat dienspligtiges kla dat hulle baie ledige ure ná hulle basiese opleiding moet deurbring. As hulle nou daardie ledige ure kan vul met studie aan die spesifieke universiteit waar hulle ingeskryf is, kan dié tyd benut word.

Die voordele van meer navorsingstyd wat nou aan dosente gebied sal word (juis omdat meer dosente in diens geneem sal moet word), is seker een van die beste dinge in dié sisteem: dit is een van die grootste probleme in die Suid-Afrikaanse universiteitsisteem dat dosente nie genoeg tyd, en soms motivering, het vir navorsing nie. Daar word tans te veel op die breinkinders van ander wetenskaplikes staatgemaak en te min in Suid-Afrika gepubliseer.


'n Mens kan net hoop dat, as dié stelsel in werking gestel word, die nie-dienspligtige ook van die voordele sal kan gebruik. Daar is tans 'n ontsettende beperking op vermoende studente: 'n kursus mag nie vinniger as in 'n bepaalde tyd afgehandel word nie. Dit bring geweldige frustrasie vir sommige studente mee wat 'n kursus in die helfte van die tyd wat die gemiddelde student nodig het, kan voltooi. As 'n student bloot ses kursusse moet doen sonder verdere vereistes, sal die briljante student sy huidige driejarige kursus in twee jaar kan doen.

Die min vakansies is 'n wesentlike probleem van die stelsel - dit bly uiters noodsaaklik dat studente genoegsame rus moet kry tussen uitputtende eksamens of toetse. Waar baie studente ook moet werk gedurende vakansies, hetsy vir sak- of klasgeld, sal die min vakansies ook probleme veroorsaak. Die probleem kan egter opgelos word deur een termyn te gaan werk en twee te studeer.

Die instelling van hierdie skema of 'n alternatief kan vir die land slegs die beste wees. - JR

## JY MIS JOU DOEL

Driekwart van die eerste termyn van 1979 is verby. Oriëntering het die termyn ingelei waartydens die nuwelinge op PU-tradisie ingelyf is. Daar is ook Karnaval gevier waar daar groot gees gevang is en aksies van allerlei aard geseëvier het. Koshuise het mekaar voor Karnaval leer ken en weer daarna met aksies gegroet. Dit was die aangename van die termyn. Kyk ons vorentoe, lê oriënteringstoetse op die voorstoep. Nou moet jy jouself afvra hoeveel eerstejaars die voordeur met selfvertroue gaan oopmaak omdat hulle genoeg tyd deur die termyn ook aan akademie spandeer het, of hoeveel maar eerder by die agterdeur gaan uitglip en opskop omdat hulle nou beseft hulle is reeds te ver agter. Daar moet dan in so geval onthou word dat daar nog tyd, alhoewel min, gedurende die vakansie, is om in te haal. Die doel op universiteit is egter om te swot en as daar nou uitgevind word dat jy alreeds agter is, het jy jou doel gemis.-TK



Prof. Roux de Villiers het 'n voorstel ontwerp oor die herindelung van die akademiese jaar sodat dienspligtiges hulle diensplig en studies gelyktydig binne vier jaar kan ahandel.

# "KOM ONS HOU BEGRAFNIS"

- deur Josef Krüger -

● Suidwes-Afrika: Ná Minister Pik Botha se onsuksesvolle sending, brand die hoop vir 'n suksesvolle oplossing baie laag.

● Rhodesië: Met toenemende eskalering van die oorlog en onseker leierskap is die goeie era vir goed verby.

● Binnelandse terrorisme: Teen 'n onrusbarende tempo neem voorvalle van stedelike terreur, sabotasies en ontvoerings binne ons grense toe.

● Die mynstaking: 'n Direkte uitdaging aan die regering.

● Die tuislande: 'n Toenemende ontevredenheid onder die tuislanders soos gemanifesteer in die Jan Smuts-beraad.

'n Nuwe konstitusionele bedeling: Hierdie uiters belangrike aangeleentheid hang steeds in die lug terwyl spoedige finalisering daarvan dringend noodsaaklik geword het.

Bogenoemde is slegs 'n paar van die harde feite van die werklikheid waarmee ons regering vandag gekonfronteer word. Onnodig om te sê, meer as genoeg om hulle mee besig te hou. Sels al sou hulle al hulle arbeid en energie vir hierdie doeleindes benut, is dit seker nog geen uitgemaakte saak dat hulle wel sukses sal behaal

nie. Kyk egter na die feitlike situasie: Aan geeneen van die bogenoemde probleme word naastenby die aandag gegee wat dit verg nie. Die rede soos almal weet, is die Inligtingskandaal.

'n Mens se gesonde verstand sê vir jou dat dit van die allernodigste belang geword het dat die Inligtingskandaal tot op die been oopgevelek en begrawe moet word. Die hele aangeleentheid het vir Suid-Afrika te duur geword.

Na dr. Rhodde se jongste opspraakwekkende bewerings, die ontkenning van regeringskant en dr. Connie Mulder se verrassende verklaring, is die kieser nou eers in die duister. Die geloofwaardigheid van die regering word sterk gewantou, en 'n baie ingrypende stap van NP-kant is nodig om die wantroue van die kieser te laat verdwyn.

Kyk mens na die geskiedenis van die Inligtingskandaal, het 'n mens min hoop vir ingrypende en daadkragtige optrede. Die feite van die saak is dat minister P.W. Botha 'n warm patat op sy skoot het, en nie weet wat om daarmee te maak nie (vergeelyk sy "Vyfweke toespraak"). Gevolglik was ons getuies van die volgende fiasko's:

● Die wyse waarop die Mostert-verslag ontvang is

● Ondiplomatiese optrede teenoor dr. Connie Mulder

● Dr. Rhodde word toegelaat om die land te verlaat

● Die aanstelling van die Erasmus-kommissie wat tot dusver weinig gedoen het om die kiesers se vertroue te wen:

● 'n onbevredigende verslag

● nie-openbaarmaking van getuies

● 'n onlangse beslissing van die Kaapse Hooggeregshof dat die Erasmus-kommissie volgens reg nie meer bestaan nie

● Die opdrag aan die Erasmus-kommissie om die betrokkenheid van enige ministers by die aktiwiteite van die voormalige Departement van Inligting te ondersoek, behoort eerder aan 'n Parlementêre kommissie opgedra gewees het.

● Die Van den Berg-Van Zyl eskapades en die optrede van die regering in hierdie verband.

● Min. P.W. BOTHA se verklaring dat hy sal bedank indien die betrokkenheid van hom of enige van sy ministers by die voormalige Departement van Inligting bewys kan word. Vir die kieser begin dit lyk of hy te gou gepraat het!

Myns insiens het minister P.W. Botha nog net een eerbare oplossing vir sy probleem. Dit het tyd geword dat

hy oop kaarte speel. Sê aan die volk presies wat die situasie was en is - dat die geheime projekte van Inligting noodsaaklik en geregverdig was, ontken slegs oningelgtes! Waarom dan die betrokkenheid van sommige van die ministers daarby ontken? Sê aan die volk wat die beweegrede was, en sê vir hulle (en hulle weet dit wel) dat daar altyd opgetree is net met een doel voor oë, naamlik om die beste belange van Suid-Afrika te dien. Sê ook waar foute begaan is en waar daar onreëlmatighede was. Noem die skuldiges en vervolgt hulle. Skryf dan 'n verkiesing uit, want eers wanneer al die kaarte op die tafel is en daar nie meer wantroue en skinderstories met 'n geurtjie van waarheid daaraan die rondte doen nie, sal die kieser hom weer tot die stembus wend. Laat hierdie verkiesing dan dien as die begrafnis van die Inligtingskandaal, en laat ons voortgaan sonder 'n klomp geraamtes in die kas!

Die alternatief is die begrafnis van Suid-Afrika.

Die artikel is deur Politiese Perspektief van die Politiese Raad geskryf, maar weerspieël nie noodwendig die Raad se amptelike standpunt nie.

## Redaksie

HOOFREDAKTEUR: Jan Kroeze, Klooster, Tel: 3468; 22246; 22151.  
ASSISTENT-REDAKTEUR: Thomas Kruger, Klooster, Tel: 3468; 22246; 22151.

NUUSREDAKTRISE: Mariëtte van der Walt, De Wetstr. 5, Tel: 5492.  
INTERUNIVERSITÊRE REDAKTEUR: Estelle Oosthuizen, Vergeet-My-Nie, Tel: 5211/2.  
RAADSREDAKTEUR: Izak Minnaar, Caput, Tel: 3375/6.  
DIEPTE-ARTIKELREDAKTRISE: Marianne Slot, Tomstr. 26, Tel: 23429.  
DAMESBLADREDAKTRISE: Anna-Marië le Roux, Karlien, Tel: 3214/5.  
KUNSBADREDAKTEUR: André Howard, Klooster, Tel: 3468; 22246; 22151.  
SPORTREDAKTRISE: Rolene Koch, Vergeet-My-Nie, Tel: 5211/2.  
VAALDRIEHOEKREDAKSIE: Koos Pretorius, Tel: 43915; Algerda van Dyk, Tel: 3364356; Leon Botha, Tel: 337232.  
FOTOREDAKTEUR: Jaco Pretorius, Oppikant.

TEGNIËSE REDAKTRISE: Renéé Puren, Wag-'n-Bietjie, Tel.: 4277/8.  
VERSPREIDINGSREDAKTEUR: Louis van der Linde, Klooster, Tel.: 3468; 22246; 22151.  
OPLEIDINGSREDAKTEUR: Henning van Aswegen, Hombro, Tel.: 7996; 23915.  
SEKRETARESSE: Marietjie Eloff, Huisvaderswoning, PU vir CHO, Tel.: 3952.  
PENNINGMEESTER: De Wet du Plessis, Tomstr. 33, Tel: 7094.  
SSR-LID VIR WAPAD: Anne-Marie Jacobs, Wag-'n-Bietjie, Tel: 4277/8.  
SPOTPRENTTEKENAAR: Mynderd Vosloo, Caput, Tel.: 22371; 3375/6.  
REKLAMEBESTUURDER: Jacques Pienaar, Klooster, Tel.: 3468; 22246; 22151.



# UIT NO. 13

## "BYBEL IS WOORD VAN GOD"

Geagte Redakteur,  
In "Die Wapad" van 16  
Maart verskyn 'n brief getitel:  
"Bybel nie as Gods Woord

## Uit die Woord

"Laat die liefde ongeveer  
wees."

Rom. 12:9

Hoe lyk jou en julle twee se liefde? Die Bybel sê dit moet eg wees, deurskynend sonder enige vlekke daarin. Jongmense sê dis presies wat ons wil hê. Ons is siek en sat vir die gemaakte liefde, die geveinsdheid, die skynheiligheid van die ouer geslag. Ons wil eg lief hê, en het mekaar eg lief. En daarom: Is dit of dat toelaatbaar?

Dit is 'n gevaarlike ding om te sê of te beoefen, want dit is nie heeltemaal waar nie. Daar is ook slegte mense en slegte dinge. Een ware ongeveerinsde liefde waarvan die heilige Skrif spreek, hou daarmee rekening. Daar is mense wat in die Bybel "honde" en "varke" genoem word. Daar is mense wat ek nie in my huis mag ontvang nie (2 Joh.: 10-11). Daar is ook gewoontes en praktyke wat verkeerd is. Die ware liefde hou hiermee rekening. Hy is nie blind nie. Hy kan onderskei. 1 Fil. 1:9-10 sê dat die liefde moet groei in kennis en ervaring om die dinge waarop dit aankom, te onderskei. Dan sal jy rein wees.

Julle sal onderskeidingsvermoë aan die dag moet lê tydens karnaval, intervarsity, sêr, flik ens. Jy moet vasstel wat wesenlik waarde het en wat nie. Doen dan wat in Rom. 12:9 staan: "Laat die liefde ongeveerinsde wees, verafsku wat sleg is; hang die goeie aan."

Jy moet weet wat sleg, gevaarlik en sondig is. En hier staan nou dat jy jou met afsku daarvan moet distansieer. Ongeveinsde liefde kan standpunte inneem; kan beslis "nee" sê vir dit wat sleg is. "Hoe kan ek hierdie groot kwaad doen en sondig teen God," (Gen. 39:9).

Maar dit is nie nodig om net negatief te wees nie. Ons is nie net teen dit wat sleg is nie. Ons hang die goeie aan. Ons kom uit daarvoor. Ons staan daarby. Ons wy ons daaraan. Ons het behoefte aan sulke Christenstudente. Wil jy nie so wees nie?

Onderskei tussen sleg en goed. Verafsku wat sleg is. Gaan voluit vir die goeie. Dit is die moeite werd. Dan sal jy rein wees en vir niemand tot struikeling nie (Fil. 1:10).

aanvaar". Die skrywer van die brief sê: "... ek (beskou) die Bybel nie as die sogenaamde Woord van God nie." Hy sê verder dat daar in die Bybel wel "maatstawwe van betekenis" is, maar dat ander "minder sinvol" is en dat hy teenoor ander "agnosties staan".

Met hierdie uitlatings spreek die skrywer sy minagting teenoor die Woord van God uit. Hy loën die Woord van God en daardeur loën hy ook die God van die Woord. Die Bybel is die Woord van God. Met sy agnostisisme kan die skrywer niks daaraan verander nie. Sy insig is maar redelik beperk. Ek wonder hoe verklaar hy II Tim. 3:16 "Die hele Skrif is deur God ingegegee ..."

Die skrywer het dit teen die ASB wat op die grondslag van die Bybel funksioneer, maar beseft hy nie dat die PU dieselfde grondslag het nie? As hy ontuis voel by die ASB om bogenoemde rede, onder andere, hoe is dit dan moontlik dat hy kan tuisvoel op die PU? Hoe kan hy christelike hoër onderwys beoefen terwyl hy die Bybel nie as die Woord van God aanvaar nie? Ek sal graag met die skrywer in gesprek wil tree oor sy onsinne uitlatings.

Johann le Roux.

## DAMESROOK ONDERSTEUN

Geagte Redakteur

In reaksie op "Johnny" se betoog teen damesrook op die kampus: Wie gee mans die reg om te aanvaar dat alleenlik mans die reg het om op die kampus te rook? Waarom is hierdie nadelige gewoonte slegs tot die kategorie van mans beperk? Dit is mos nou diskriminasie in die ergste graad! Blykbaar lyk 'n rokende Puk-man met sy "kromsteel-Keiser-pyp" in die mond beter as 'n rokende Puk-dame met 'n elegante sigaretkoker en ligte sigaret spesiaal vir dames. Doen so 'n rokende Puk-dame die Puk-beeld dan meer oneer aan as so 'n rokende Puk-man?

Verder gebruik "Johnny" die voorbeeld waar 'n Puk-dame in "klas-draf-jeans en Pote-sokkie-plakkies" by die Sondagoggend erediens opdaag. Hieroor wil ek net dit sê: 'n man daag in 'n pak klere by die erediens en 'n dame dienooereenkomstig ewe netjies en galant gekleed in haar Sondagklere. Maar as mans normaalweg met "klas-draf-jeans en Pote-sokkie-plakkies" by die erediens opdaag, het dames sekerlik ook die reg om so gekleed daar op te daag (of sal die reg net tot mans beperk wees volgens Johnny?). Dames sal nie noodwendig "kromsteel-Keiser-pype" rook net omdat mans dit doen nie, net soos wat dames nie in 'n pak klere by die erediens sal opdaag nie, net omdat 'n man 'n pak klere dra nie.

Mans mag rook binne en buite die grense van die PU, maar Puk-dames mag klaarblyklik slegs buite die grense van die PU rook. Hoe dan nou?

Ek lei af dat daar geen beswaar moet wees indien 'n Puk-dame sou verkies om op die kampus te rook nie (dis nogal ongerieflik om weg van die PU in die openbaar te gaan rook elke keer wanneer mens lus voel daarvoor!). Bowendien is rook vir dames ook nie "'n poging tot volwasse vrou-wees" nie, net

soos wat dit nie vir mans 'n poging tot volwasse man-wees (behoort) te wees nie.

**TOFFIE**  
(Hiermee word die debat oor damesrook afgesluit - red.)

## DERTIG PERSENT AFRIKANERS IS CHRISTENE

Geagte Redakteur

Graag wil ek kommentaar lewer op u antwoord op my brief: "Spotprent ontlok reaksie" van 22 Maart. U maak die stelling: "'n Goeie Afrikaner is 'n goeie christen". Dink u nie dit is 'n onverantwoordelike uitlating nie? Volgens watter statistieke maak u die uitlating?

Ek sal graag op my beurt statistieke wou gee: volgens 'n opname in 1976 is 42 persent van die totale blanke bevolking in S.A. gereelde kerk-gangers, dus in die ware sin van die woord christene.

Daarvan sou mens op die maksimum 30 persent Afrikaners kan uitsonder. Die teendeel van u stelling is eerder waar: 'n goeie christen is 'n goeie Afrikaner (as hy Afrikaanssprekend is). Dus beteken dit dat ongeveer 30 persent van die totale blanke bevolking in S.A. goeie Afrikaners is. Sou u nie sê dit is pateties nie?

Kan u dalk sê volgens watter maatstawwe oordeel u of iemand 'n goeie Afrikaner is of nie? U weet 'n Afrikaner kan 'n goeie Afrikaner wees: maar hy glo nie noodwendig in God nie - ek ken baie van hulle. As u sê 'n goeie Afrikaner is 'n goeie christen, dan is geloof in God mos nie nodig om as Christen geklassifiseer te word nie! Ek dink ons moet baie versigtiger wees met die woord christen - dit word te goedkoop gebruik.

**J.C. van Schaik.**  
(Die uitlating was nie op statistieke gebaseer nie, maar op die algemene aanvaarde beskouing van die tradisionele Afrikaner. Bravo vir u laaste sin! - Red.)

## PUK-GEDRAG ONDER SKOOT

Geagte Redakteur

Die gedrag van sommige Pukke Saterdag op die pawiljoen (en op die veld) was laakbaar om die minste daarvan te sê. Dit is moeilik om te glo dat opgevoede mense so in die openbaar kan optree - soveel te meer wanneer hulle in 'n groep is waarna later vinger gewys kan word.

Hoe vind mens regverdiging in die optrede om bierblikke na mense te slinger, soveel te meer nog waar daar 'n moontlikheid is dat onskuldige mense getref kan word, soos dan wel ook gebeur het met die jong dame wat ewe gevraag 'n bierblik teen die voorkop gekry het en die middeljarige man van die gewone publiek wat met 'n halfvol bierblik teen die rug getref is. Was dit nou nodig om te wag tot die ASB se President 'n beroep op die skare doen, voor sommiges besluit het om hulle te gedra?

En dan meen ek ook die PU se arme dirigent kon 'n beter poging aangewend het om die mense onder beheer te bring. Hy het wel gevra dat

die blikgooiery gestaak moet word, maar was dit nodig om by te voeg: "As julle moet gooi, gooi tog net raak"? En was dit nou regtig nodig vir mnr. Kriel om van die luidsprekerstelsel gebruik te maak vir sy persoonlike geflankeerderij? Of was dit nou juis die grap?

Dit is moontlik dat die massa geaktiveer is deur die vuil spel van sommige Puk-spelers op die veld, soos wat die baie strafsoppe wat die PU teen hom gekry het, wel getuig.

Is daar dalk iewers fout?

Paul Prinsloo

## PEDRO SOEK NAAM

Pedro,

Ongelukkig kan ons nie jou brief plaas nie. Indien jy egter jou volle naam verstrek kan dit geplaas word.

## "VAKIDIOTE" BANK INTER- FAKULTÊRE LESINGS

Die Redakteur

Voor my het een dosent onbeskaamd op sy arms gelê en slaap, langs my het twee eerstejaars voorgeskrewe boeke onder die bank gesit en lees, agter my het nog eerstejaars gesit en giggel, briefies geskryf en rondgeskuifel; na teetyd kon hulle gelukkig ontsnap. Die saal was omtrent kwart-vol.

Dis die I.W.-lesings, I.W.-dag, lekker braaivleis by die dam! Die enigste probleem is om die eerstejaars daar te kry - een senior het op die uitstekende gedagte gekom om iemand anders te vra om 'n toets op te stel na aanleiding van die lesings; hoe sou hy nie die eerstejaars kon 'graaind' as hy uitvind hulle was nie daar nie! Self gaan? Grappieeee!

Vir die mense wat die probleem van die universiteit in die twintigste eeu bestudeer, wat met komier die professionalisering en vertegnokratisering van die universiteit gadeslaan, wat sien hoe die fakulteite al verder uitmekaar uitdryf, vir hulle het die Interfakultêre lesings 'n bespotting geword. Die idee om mense van verskillende fakulteite aan te moedig om buite elkeen se vakgebied te ontmoet, slaag nie op die huidige manier nie.

Dit is onmoontlik om drie sprekers op een oggend in te druk en sinvolle bespreking te vermag. Dit gaan verder nie help om weereens vakkundiges te laat voorberei om te antwoord op die hoofspreek nie; dan gaan juis die Inter- van die Inter-fakultêre lesings verlore. Die rede vir hierdie werkswyse kan ek egter deeglik begryp. Ons studente en dosente is so tevrede om agteroor in die bekende wêreldjie van hulle vakkie te gaan sit. Een dosent het selfs vir sy studente gesê dat hulle maar kan wegby omdat die lesings eintlik vir Lettere en Wysbegeerte-studente bedoel is. Diesulkes is nie bereid om 'n greintjie breinstof te gebruik om die sake wat werklik van belang vir ons menswees is, te bespreek nie.

Die organiseerders van die lesings het 'n akuele tema gekies en goeie sprekers gekry. Al wat 'n mens moes doen, was om belang te stel; mens hoef nie eers 'n bydrae te lewer nie; wys net dat jy, na

Briewe moet nie langer as 300 woorde lank wees nie, anders sal dit verkort word.

'n paar jaar op universiteit, darem al 'n bietjie jou vakidoot-mentaliteit ontgroei het.

C.J. VAN RENSBURG

## VERSLAAF AAN S.A.-NERSKAP

Geagte Redakteur

Hiermee wil ek Estelle Oosthuizen bedank vir haar fees van 'n brief in Die Wapad van 16 Maart. En wil ook my deeltjie bydra as 'n verslaafde aan Suid-Afrikanerskap.

Daar is die onbeskryflike gevoel van groot lekkerkry wat ek ervaar as ek Sonja Herold se "Tant Mossie se sakkie, sakkie, sakkie boeredans" hoor; deur wie ook al gesing.

En as ek in die Langsleep sit en in wit kryt teen die bruin muur lees: "Die berggans het 'n veer laat val; van die hoogste krans by Woepersdal"

Of toe ek en 'n meisie sit en eksperimenteer het met Die Stem. Al Die Stem gesing op die wysie van "House of the Rising Sun"? Sô sal ek Die Stem op die Rooi Plein in Moskou staan en sing.

En ek sal nie as grote, stoere Afrikaner vir my land wil sterf nie. Maar as Suid-Afrika se toekoms op die spel is, sal ek as Suid-Afrikaner vir my land en my mense baklei tot die bloed loop en die been wys en die dood intree.

Uit eie ervaring kan ek dus Suid-Afrikanerskap aanbeveel. En beklemtoon dat dit heerlijk is om daaraan verslaaf te wees.

C.F. SCHOEMAN

## ANTI-"TERT" SKRYF

Die Redakteur

As beskroomde Afrikaner-meisie voel ek my geroepe om van my te laat hoor in reaksie op die gebruik van 'n

skokkende term soos "optert" in u blad.

Dit is 'n verlaging van die meeste morele standaard van elke beskeie meisie wat haarself kan weerhou van 'n klakkelose najaag van al die nuutste modes en grille. Ek het al gehoor dat dié spesifieke term baie lelike konnotasies by party lede van die manlike geslag dra.

Ek kan egter goed verstaan dat 'n arme meisie wat vrou-alleen die hele damesblad moet behartig, so 'n oordeelsfout kon begaan. Dit is na my mening niks minder as reg dat u as man haar moet beskerm nie.

Veral as redakteur van 'n koerant behoort u bewus te wees van die verskriklike aanslae van buite. Dit is die werk van die kommuniste dat ons nie meer kan onderskei tussen die betaamlike en die onbetaamlike nie.

Ek hou u as die sterkere wat dus verantwoordelik vir die onuitwisbare klad wat deur 'n afbrekende term soos optert teweeggebring is. My dringende versoek aan u is dus om mej. Poplap te help teen die aanvegtinge van sedelike verwaarloosing en om vir haar, 'n onbeholpe meisie, 'n wag voor die lippe te wees.

Susarah J.A.C.M. van der Merwe.

(Die Wapad-redaksie sou graag wou weet wat die breë Puk-dame van Poplap dink. - Red.)

## BERIG VEROORDEEL

Die redakteur,

Ek wil net die skrywer van die artikel "Studente verwaarloos breinkrag" in Die Wapad van 16 Maart 1979 vra wat hy nou eintlik probeer sê. Dit laat my dink aan 'n bejaarde omie wat die tyd probeer omkry deur die heeldag te praat en niks te sê nie. Of soek hy net geselskap? Indien wel, kan ek hom verwys na die Hoekie vir eensames in die Landbou-Weekblad.

Red nou die PU met sulke studente!!!

DOGMATIX



CERTAIN T SHIRTS

HIGH QUALITY SILKSCREEN  
PRINTERS

4 Grobler Street, Potchindustria  
Tel. 23863

# REVLON

Jontue  
eau de toilette

ONTDEK JONTUE - Die wonderlike geur van Revlon. Revlon bied u 'n geskenk van "Jontue Spray Mist" aan, saam met enige aankope van R6.00 en meer, terwyl voorraad beskikbaar is.

'n Skoonheidsdeskundige sal beskikbaar wees om u van raad te bedien.

**LEWIS EN VAN HEERDEN APTEEK**

Kerkstraat 133. Tel. 3656



Spektrum  
1979

# TJELLIS SPEEL IMPOSANT

- ANDRÉ HOWARD -

Die Oostenrykse tjellis Heinrich Schiff het Maandagaand 26 Maart 'n uitvoering gelewer wat 'n mens by tye verstom gelaat het. Saam met sy begeleier Lamar Crowson het hy daarin geslaag om die rykste en warmste klanke denkbaar uit sy tjello te haal. Ander kere het 'n mens die grootte van sy instrument heeltemal vergeet, so virtuoos was sy spel.

Die eerste werk op die program was die Beethoven-  
variasies gebaseer op 'n duo uit die "Towerfluit van

Mozart". Hier het 'n mens alreeds bewus geword van sy rotsvaste intonasie en die volkome beheer oor sy instrument. Hierdie eienskappe is verder voortgesit in sy tweede werk, die Brahms-sonate in F majeur wat uit vier dele bestaan. Veral in die derde beweging van hierdie werk het hy daarin geslaag om die speelse karakter van die beweging baie duidelik oor te dra. In die baie stormagtige en hoogs romantiese vierde beweging was die afwisseling tussen die liriese en meer dramatiese gedeeltes baie treffend.

Na pouse het 'n ongegeleide werk gevolg naamlik die suite nr. 2 in d mineur van J.S. Bach. So 'n tipe werk berus natuurlik geheel en al op suiwer intonasie, maar dit was vir hom geen probleem nie. Veral in die stadige bewegings van hierdie werk het die enigste hinderlike aspek van sy spel werklik na vore getree. Die hele program was ontsaglik musikaal voorgedra en miskien juis as gevolg daarvan, was hy geneig om te veel klank te verloor op sy minder belangrike posisies. Dit was in 'n mate verdoesel deur sy musikaliteit, maar soms het dit tog baie duidelik na vore gekom.

Schiff het sy program afgesluit met die Rossini-variasies van Bohoslav Martinu. Die werk word eintlik gekenmerk deur ritmiese vltaliteit en daarmee saam het hy ook interessante klankeffekte verkry deur 'n tipe glissando. As toegif het Schiff 'n werk van Fauré gespeel.

Heinrich Schiff het met hierdie konsert daarin geslaag om al die vereistes van goeie spel sinvol te kombineer om só 'n baie geslaagde geheel te verkry. Dis net baie jammer dat nie meer mense die kans benut het om hierdie konsert by te woon nie.



Elize Venter en Jacques van der Merwe in 'n toneeltjie uit die aanbieding van DIE RISSIE van Charles Marowitz. (Foto Frik Shoeman)

## RISSIE BIED NUWE VOORUITSIGTE

Die sombere afskeid van Hester Smit en haar vereensameerde broer Johnnie, wat die pasafgeleide aanbieding van Athol Fugard se drama "Hello and goodbye" hulwer nog onwillekeurig in die geheue... Die plakkate kondig alweer 'n nuwe stuk aan: "DIE RISSIE" open op 2 April.

Dit is 'n stuk van 'n heel ander aard. Ons word terugverplaas na die Middeleeue maar die onderwerp bly altyd jonk, altyd hede naamlik die liefde. Die ewigwisselende spel tussen man en vrou, die ongeluk, die vreugde en die onmisbare komiek daarvan word pragtig uitgebeeld deur die begaafde dramaturg Charles Marowitz. Hy het alreeds roem verwerf vir sy "A Macbeth" en "The Marowitz Hamlet". Ook in "Die Rissie" gebruik hy die oorspronklike drama van Shakespeare, "The Taming of the Shrew" as grondpatroon waarop hy sy idees oor die liefde, die man en vrou uitwerk: Dis 'n inte-

ressante, dramatiese spel waarin die oue en die moderne op 'n subtile wyse teen mekaar afgespeel word. Tegelyk is dit ook 'n demonstrasie van intellektuele gimnastiek. Waar wyk hy af van die Shakespeare? Hoekom wyk hy af? Wat bereik hy met die gebruik van die oorspronklike Shakespeare-tëks? Dis alles vrae wat beantwoord word met Liesbet Schoeman se aanbieding van "Die Rissie" deur Charles Marowitz binnekort in die PU Kamertoneel, Hoffmanstraat 10. Plekbespreking by mev. Gerty Botha, Departement Spraakleer en Drama, Hoffmanstraat 4.



Riena van Graan by van die skilderye wat op die uitstalling te sien is. Die uitstalling duur tot 11 April. (Foto Frik Schoeman)

## RIENA VAN GRAAN STAL UIT

- Johan Myburg -

Die grootste eenmanteltonstelling van Riena van Graan is op 20 Maart in die uistallingslokaal van die Frans du Toit geopen. By dié geleentheid was Ines Aab-Tamsen teenwoordig wat die kunstenaars aan die publiek bekend gestel het.

Riena van Graan is van Pretoria afkomstig, waar sy ook deel van haar opleiding

ondergaan het. Sy het ook in Italië onder prof. Primo Conti gestudeer, waar sy ook aan groot uistallings in Italië deelgeneem het.

Wanneer 'n mens die uistallingslokaal binnekom, val die helder kleurgebruik dadelik op: landskappe in donker blou, donker rooi en soms gryse.

Landskappe vorm die hoofbestanddeel van hierdie uistalling van vyftig skilderye.

Die kunstenaars se werke vertoon 'n somberheid wat ontstaan as gevolg van gebrek aan lig - die sonlig wat juis die Suid-Afrikaanse landskap kenmerk.

Die potloodsketse en waterverf - pastelwerke vertoon 'n tegniese vaardigheid, maar bly net skulpe en rotse wat soek na bewuste vormgewing.

'n Sterk vleug van naiwiteit spoel deur die kunstenaars se werke, waarin van die fyn aanvoeling vir die natuur tog verlore gaan.

## Skuiwergat

DEUR  
GRIMALDI

OM ONS ou volkie in hierdie tyd as kultuurloos te bestempel sou seker aan heiligskenis grens. Kyk net hoe getrou word die première van die nuutste toneelopvoerings en films bygevoeg (die komplementêre kaartjies maak mos in hierdie geval glad nie saak nie). En dan nog volksfeeste en Stryddae, noem maar op ons kultuur gaan vooruit!

Om verder oor kultuur te sanik, is genoeg om myself en baie ander mense 'n kramp op 'n ongemaklike plek te gee. Maar hoe kulturbewus is die gemiddelde student op ons kampus. Verstaan my mooi, ek is nie nou die stem in die woestyne wat roep en almal probeer oortuig om nou kultuur-wrakke te word nie! 'n Mens begin egter wonder as 'n skrale dertig mense die opening van 'n kunsuitstalling bywoon of wanneer die saal halfvol is wanneer 'n kunstenaar van wêreldgehalte 'n uitvoering lewer.

Het dit nie miskien tyd geword om 'n kultuurherlewing op ons kampus te laat plaasvind nie. En dan bedoel ek nie net op die gebied van die kunste nie, want dit is maar 'n klein deeltjie van ons kultuur. Identiteit is aan die orde van die dag, maar as die kultuur vergeet word kan ons maar identiteit probeer behou en tradisies bewaar tot ons blou word; ons kan vergeet om lewers te kom. Solank as wat kultuur net bestaan uit die kennis van die nuutste poptreffers, kan ons ou volkie sy identiteit ook maar op sy maag skryf.

hotel elgro - hotel elgro - hotel elgro - hotel elgro - hotel elgro - hotel

# kontiki



steakhouse - braairestaurant

12 - 2 nm daagliks - 5.30 - 10 nm weksdae - 5.30 - 8 nm Sondae

# aquarius

ten volle gelisensieer  
fully licensed

dameskroeg - ladies bar 5 nm - 1 vm - 5 pm - 1 am

hotel elgro - hotel elgro - hotel elgro - hotel elgro - hotel elgro - hotel



# Poplap

## Poplap sê 'lo . . .

Met 'n bly hart en 'n groot glimlag vir "ons intervarsity" sê ons weer dag uit die dameskamp. Mooi lyk en aantrek bly maar lekker, selfs al kan mens net na die baie mooi winkelpoppe kyk. Poplap het gaan kers op-

steek by Potch se eie modebaas. Verslag oor die doen van die ander kampus-nooiens en 'n bietjie meer verstaan van die swartman en -vrou van die kampus maak die week se spyskaart vol.

# LEWER GEMEENSKAPSDIENS IN DIE KOSHUIS

Dis 'n vraag of die swartvrou wat so gereeld die koshuisgang vee, afwas en politoer, en soms die plante water gee se behoeftes verstaan en geken word.

Die woord "bantoe" wat altyd gebruik is, is 'n misleidende woord. Dit is 'n versamelnaam vir 'n groot verskeidenheid swart volke, wat in Suid-Afrika woon. Die woord is ontleen aan 'n oer-bantoe-woordstam "-ntu" wat "mens" aandui: Mo-ntu - mens; Ba-ntu - mense.

Die wyse waarop die swartmens deur die blanke aangespreek word, is bepalend vir die onderlinge verhoudings. Aanspreekvorme wat kwetsend is (al word dit nie so bedoel nie) moet ten alle koste vermy word.

Die populêre aanspreekvorm "boy" of "booi" moet vermy word. Tradisioneel beskou die swartmense 'n "boy" (seun) as 'n redelose wese wat nog nie die dinge van 'n kind afgeleë het nie. Daarteenoor is die swartman of vrou in alle opsigte 'n volwasse persoon wat al die verantwoordelikhede van die lewe kan aanvaar.

Dit is baie ontakvol om betedigende taal teenoor die swartmens te gebruik, aangesien hy geleer is om altyd te poog om hofflik en vleiende dinge aan 'n ander persoon te sê. As hy dit nie kan doen nie, bly hy liewer stil. Die swartman hou ook daarvan om op sy naam aangespreek te word. Indien sy of haar

naam nie bekend is nie, kan die volgende aanspreekvorm gebruik word: Morêna - meneer en mosadi - mevrou.

Dit sal dus baie voordelig wees om die name van die koshuis en eetsaalbediendes aan te leer. Geen persoon, ongeag ras of kleur, wil 'n aanspreeklike nommer wees nie.

In die teenwoordigheid van sy meerdere sit die swartman, in teenstelling met die blanke wat dit as hofflik beskou dat die mindere sal opstaan. Vir die swartman mag die meerdere nooit opkyk na die mindere nie. Deur die mindere se opkyk na die meerdere, betoon hy respek.

Die swartman is van jongs af geleer om altyd plesier aan sy meerdere te verskaf. Hierdie opvatting bring mee dat die swartman gewoonlik op 'n vraag van die blanke sal begin om 'n uitvoerige relaas te gee. Soms lyk dit selfs of hy die vraag wil ontduik. Deur middel van so 'n omslagtige relaas poog die swartman om die pad oop te maak vir dit wat hy eintlik moet sê.

Dit gebeur ook dikwels dat die swartman positief antwoord op 'n vraag van sy werkgewer, terwyl dit nie werklik die geval is nie. Die blanke moet liewer op 'n

# CRONJÉ LEMMER GEE RAAD

Die vraag, "wat sal ek aantrek?" is beslis nie onbekend nie. Met byna elke geleentheid duik dit op en voor 'n nuwe seisoen is dit op almal se lippe, veral as dit so 'n opwindende seisoen is soos die winter van '79

Dit is nie te sê dat wanneer iets as mode beskou word, dit elkeen gaan pas nie. Die mode is daar vir almal en uit al die gegewens moet die dame selekteer en aanpas by die figuur, ouderdom en die beursie.

Die mode van hierdie seisoen is nou rompe. Dit is tog logies, omdat wintermateriale soos tweed te dik is om 'n romp met 'n ander snit te maak. Vir praktiese redes het die nou rompe dan plooië of splete. Omdat die Suid-Afrikaanse vrou anders gebou is as haar Europese suster - is 'n romp wat nie totaal "pencil" gesny is nie vleiender vir haar figuur. Met ander woorde iets tussen 'n A-snit romp en 'n nou romp pas die vrou die beste. Waar die materiaal egter baie lig en sag is, is voller rompe ook mode.

Vir 'n goeie balans is die langer baadjie saam met die nou romp en die kort baadjie saam met die wyer romp ideaal. Die skouers word effens gestop of opnaaisels word oor die skouerlyn gestik.

Gestreepte materiaal vir onderbaadjies is hoogmode. Die krae is aangesny en smaller. Pildooshoedjies met 'n stuler is die "in" ding. Dit moet die gesig egter volmaak pas.


Vir kladraf is gemaklike warm klere noodsaaklik. Rompe met onderbaadjies wat geruil en gepas kan word, is ideaal; truië en by-passende musse eerder as opsmuk met 'n pildosie. Die romplengtes is goed onder die knie met stewels daarby. Langbroeke (die pype is heelwat nouer) en tunieks voltooi hier 'n interessante klerekas, waarby verdere aanvullings gedoen kan word.

Formele dagdrag sluit klere vir kuter en kerk in, byvoorbeeld 'n rompbaadjie en 'n sagte bloese van wol of crepe daarby. Hierby word

die pildooshoedjie en kovert-tipe handsak gedra. Skoene sonder platvorms, mooi hoë hak en 'n slanke toon pas baie goed.

Formele aandrags maak hier voorsiening vir die laat middag. Aanddrag is vroulik en sterk 1940-geïntendeerd. Sagter vol rompe effens gedrapeer of slank en nou, met

'n spleet is baie gewild. 'n Kort jakkie, met gestopte skouers, voltooi dié prentjie, saam met die pildooshoedjie



## DIE KAMPUSNOOI UIT ANDER OORDE:

OP KOVSIES is daar ondersoek ingestel na die lae stemmentasie vir hul joolkoninkin. Dit het gebleek dat daar 'n duidelike meningsverskil tussen die mans- en damesstudente is. Die kompetisie is vir die mans 'n noodsaaklike deel van jool. Party voel tog soms word die dames aan 'n skouperd gelyk gestel. Daar word beweer dat die heel mooistes nooit aan so 'n kompetisie deelneem nie. Met so 'n kompetisie word daar te veel na die uiterlike gelet. Sommige dames beweer dat baie dames nie vir mooistes stem nie omdat sy mooier is as jyself. Sommige dames wonder ook of daar nie 'n gekullery is tydens die stemtellery nie. Die joolleier van Kovsies voel dat die lae stemmentasie maontlik te wyte is aan die sentrale stemlokaal, en voel dat dit beter sal wees as die student eerder by die onderskeie koshuise kan stem. Die kompetisie is egter noodsaaklik vanweë die liefdadigheid daaraan verbode.

Op die TUKS-kampus is daar ook daagliks groot dinge aan die gebeur. Madelief, die nuutste dameskoshuis op die kampus hang uit met die besluit om te begin met die opbouing van 'n kunsversameling. Die doel van die besluit is om die openbare sitkamers en die portale met werke van gehalte te versier. Daar sal ook opvoedkundige waarde uit die kunswerke geput kan word omdat die studente se kunswaardering hierdeur ontwikkel word. Daar is verskeie kunstenaars genader om skenkings te maak en daar is alreeds werke van Cristo Coetzee en Dick Findlay ontvang.

## N.S.

Werk maar spaarsaam met die sente; winterklere is verduur. Sukses met die kreatiwiteit voor die naalmsjien. Geniet die vakansie en die laaste van die herftson. Ons groet tot Meimaand, Poplap.

# SARIE VERRAS OOR GUL ONTVANGS

SARIE se werkwinkelspan, Anet en Nicolene Strydom was heel verras met hul hartlike ontvangs deur ASTER en die PU-dames.

Die SARIE MARAIS het haar sesde en laaste werkwinkeldraai hier op Potchefstroom kom maak op 21 en 22 Maart. Die twee sprankelende dames kan nie uitgepraat raak oor die spontaneiteit van die PU-studente en die flinkheid van die Asterkomitee nie.

'n Pluimpie vir die PU-dame: Raymond, modern

uitgevat in 'n duifblou serp en pet; gewoon aan die stadsdames vanaf New York tot in Johannesburg, vind die ongekunstelde PU-asters verfrissend en inspirerend. Dis benydenswaardig om te sien hoe vlytige vingers fluks 'n knots op die kop kan draai, om Santie van Knoppiesbult na 'n Vogue model te laat lyk.

Wat veral byval gevind het is Ruth, die grimeerdeskundige se ligte hand. Die grimering is smaakvol aangewend, sonder daardie swaar opgesmuktheid wat gewoonlik die resultaat van so 'n demonstrasiekursus is.

Vir die interessantheid kan die SARIE gerus dopgehou word om te sien hoe die agt proefknyne 'n metamorfiese ondergaan het.

ander wyse vasstel of die swartman wel die opdrag begryp, byvoorbeeld deur hom te vra om die opdrag na te boots of te herhaal.

Die student word dikwels ongeduldig as die bediendes in die eetsaal so tydsaam is met kos inskep, veral tussen een en twee in die middag. Die swartman se begrip van tyd verskil egter radikaal van die van die blanke. Hy dink oor die algemeen nie soos die blanke in terme van ure en minute nie. Hy dink eerder in terme van 'n tyd om te werk en 'n tyd om te slaap. Dit gaan nie soseer om 'n bepaalde hoeveelheid werk wat in 'n bepaalde tyd klaar gemaak word nie. Hy glo dat daar altyd werk is. 'n Mens maak nie die werk klaar nie; die werk sal eerder die mens klaarmaak. Hy werk dus só dat hy kan aanhou werk. Hy raak nie graag haastig nie.

Die kenmerkende laudrugtigheid van die bediendes, op 'n Sondagmiddag of in die nag, het menige studente van 'n goeie ruskans beroof en hul selfs die harnas in gejaag. Die swartman se beskouing is dat sy teenwoordigheid aangekondig moet word wanneer hy die terrein van 'n ander persoon betree, veral wanneer hy nie gesien kan word nie. Iemand wat sy teenwoordigheid probeer geheim hou het slegte bedoelings. Hulle sê dit is net 'n dief of 'n moordenaar wat stilswyend in die nag rondloop. Dit is ook die rede waarom die swartmense sesuur in die oggend loop en sing.

Dit gebeur dikwels dat die swartman voor 'n kamerdeur of op 'n werf sal ronddraai sonder om te klop. Dit is tradisioneel by die swartman dat wanneer hy iemand besoek, hy eers op die persoon se werf moet rondstaan, totdat die huisbewoner uitgestap kom as teken dat hy bereid is om die besoeker te woord te staan. In aansluiting hierby is die feit dat die swartman nooit eerste sal groet nie. Hy is so opgevoed dat die meerdere die mindere eerste sal groet om daardeur sy welwillendheid te wys.

Hierdie paar gedagtes omvat beslis nie al die wette en gewoontes van die swartman nie. Alles kan egter nie in een artikel geplaas word nie. As daar verdere vrae of probleme is sal Poplap weer 'n poging aanwend om dit te verhelder.





## Sport

# PUKKE LAAT KEURDERS KOPKRAP

Een ding is beslis seker, en dit is dat die PU-keurders en die Wes-Transvaalse keurders nog baie gaan kopkrap ná die PU se oorwinning van 25 - 22 oor Wits.

Ten eerste moet James Stoffberg en sy span geluk gewens word met hul oorwinning, maar dan moet in dieselfde asem genoem word dat daar nog baie probleme is wat uit die weg geruim moet word. Die grootste probleem tydens hierdie stadium van die wedstryd blyk die spelers se fiksheid te wees. Na 'n gemaklike voorsprong van 16 - 6 in die eerste helfte, moes die Pukke sukkel om uiteindelik met slegs drie punte te wen.

André Markgraaf, James Stoffberg, Judge Venter en Michael Carlisle se spel was uit die boonste rakke. Met hierdie spelers as hoekstene kan die PU vanjaar nog groot hoogtes bereik. As al die PU-spelers se spel tot dieselfde gehalte kan verbeter, is daar 'n feit wat soos 'n paal bo water staan en dit is dat die PU-spanne vanjaar moeilik geklop gaan word.

Allan Sutherland en sy span van Wits moet ook geluk gewens word met hul puik

spel. Soos alreeds in ander koerante genoem is, was Wits teoreties die beste span op

die veld, maar studente-rugby sorg altyd vir groot verrassings.



Jorrie Jordaan in volle vaart op pad doellyn toe.



Met aanstormende Witsies raak Schalk vd Merwe haastig ontslae van die bal terwyl Judge Venter, Erte Jacobs en Dirk de Vos (op die grond) toekyk.



'n Vasberade Dirk de Vos raak haastig ontslae van die bal terwyl Piet de Konker en Paul Bayvel toekyk.

# PUKKE PRESTEER BY EEN UUR BYEENKOMS

Tydens die Claassen-broers-uitnodigings byeenkoms gehou op Woensdagaand 21 Maart het elf atlete van die PU deelgeneem.

Alhoewel die kompetisie sterk was, het die atlete bewys dat hulle die PU se naam hoog gaan hou tydens die jaarlikse Dalrymple byeenkoms teen die einde van die jaar.

Die belangrikste euitslae is soos volg:

**PAALSPRING MANS**  
1. Dawie Malan (PU) - 4,75m  
2. E. Wihann (POK) - 4,50m

**VERSPRING MANS**  
1. Johan van der Merwe (RAU) - 7,47m  
2. Stephanie Kotzé (POK) - 7,45m  
3. Fanie Campher (PU) - 7,38m

**400m HEKKIES MANS**  
1. Hannes Coetzer (NKP) - 51,75s  
2. Marius du Rand (NKP) - 52,1s  
3. Tommie Ferreira (PU) - 52,5s

**400m MANS**  
1. Filippie Prinsloo (JP) - 46,6s  
2. Otis Moshoeshe (Wes Driefontein) - 47,8s  
3. Henk van Wyk (PU) - 48,3s

**1 MYL MANS**  
1. Louis Liebenberg (POK) - 4:00,8  
2. Johan Fourie (UP) - 4:02,7  
3. Braam Heiberg (POK) - 4:04,4

**HOOGSPRING DAMES**  
1. C. Gail (D. Uys) - 1,75m  
2. Estie van der Merwe (PU) - 1,70m  
3. E. de Lange (POK) - 1,70m  
4. Nanda Barnard (PU) - 1,65m

**100m DAMES**  
1. Miemie Snyman (NKP) - 11,7s  
2. Maryna van Niekerk (Weermag) - 11,8s  
3. Annette van Wijk (PU) - 11,8s

**400m DAMES**  
1. Lorinda Nel (GOK) - 54,2  
2. Lynette Meintjies (Linden) - 55,4  
3. Louise van der Nescht (Linden) - 56,1  
4. Leonie Smit (PU) - 56,7

**100m HEKKIES DAMES**  
1. Annette van Wijk (PU) - 13,7  
2. Elize van Huysteen (Welkom) - 13,8

## Wapadjies

Bel Jacques by 3468 (Klooster) en laat 'n boodskap.

### HOU S.A. SKOON:

Die Bult-Droogskoonmaakery en wassery, Uitsigarkade, reken vinnig en flink af met gruiemke, velkollie en ander vorms van besoedeling. Kledingstukke binne slegs 80 minute droogskoongemaak. Wasgoed binne 'n halfdag gewas en gestryk.

Ure: Maandag tot Vrydag - 7vm. tot 5,30nm. Saterdag - 8vm. tot 1nm.

### KIES & KEUR:

Lyk jou kamer soos Vaalwater? Kry 'n poster by Kies & Keur! Val jou knope af, nats trek los? Naaldwerkbenodigde gajere by Kies & Keur! Behalwe materiaal; hoede, kunsblomme en mandjies, het ons nog stapels en stapels ander goed. Vat 'n dag af en kom snuffel rond by: Kies & Keur, Tomstraat 98.

### MOOI BLY?:

Kom kyk na ons groot verskeidenheid paratuur, verslankingsmiddele, proteïenvoedsel en skoonheidsmiddels vir 'n jaar van skoonheid wat voorlê. Die Bult Apteek, Tomstraat 88B & C, Potchefstroom. Tel. 5943.

### BLYRY EN RY BLY:

Nigrini Batterie is die naam as jy jou kar wegspringgereed wil hou - sonder sweet, sonder bloeddruk en teen 40% korting, spesiaal vir PUK-studente lag jy heelpad bak toe op sakgeld-dag. Storm sommer nou na Lombardstraat 27 vir jou battery. Tel. 7805.

### HOOR EN SIEN VERGAAN?:

Radio- en TV-dienste het 'n wye reeks batterye vir rekenaars, horlosies, radio's of wat ook al. Ons kitsrekenaars en Awa stereo audioversterkers vir motorradio's is ons trots - die beste in Potch, Lombardstraat 42.

### WIE WIL TROU?:

Ons het kortpad vir jou; besoek Elwina, Santam-deurloop, Tel. 5412, vir daardie mooiste trouer vir jou.

### BLOMME, BLOMME, BLOMME:

Ruikers, groot en klein, lieflike vars snyblomme en potplante wat jou jarelank geluk sal gee, is altyd te kry by FLEURETTE BLOEMISTE. Ons het ook ingevoerde snyblomme wat so mooi is dat jy nie kan ophou kyk daarna nie. Maak gerus gebruik van ons KBA diens. Dit kos niks ekstra nie. FLEURETTE BLOEMISTE, Kerkstraat 83, Tel. 4062.

### AFGESNY DEUR DUUR PETROL:

Dis nie nodig om jou kar in te ruil vir 'n mak donkie net omdat jou reistoelaag nou skielik nie vir genoeg kan rek nie. Met 'n motorfiets van FRANK MOTO X kan jy meer as tweekeer so ver kom met dieselfde petrol. Vir alle PUKKE van statige professore tot lyn dametjies is daar die regte model by FRANK MOTO X, Lombardstr. 13, Tel. 5723, Potch.

### VERSLANKERS!

Bly assabiel ver weg van TURKSTRA BAKKERY want die meer as wat vlees en bloed kan verdra. As jy eers eenmaal jou oë laat dwaal het oor ons goudbruin koeksisters, ons heerlike "kingsize" oliebolle, gevul met konfyt en room, tert, koeke en pastele. Dis nie so moeilik om TURKSTRA te vermy nie. Hulle is in Kerkstraat.

### WERKI

Vakansiewerk vir mansstudente in die Aprilvakansie: verdien vanaf R100 per week vir demoralisasie en die neem van bestellings vir huishoudelike artikels. Loosies en vervoer word verskat. Kontak student Dust by telefoon 339616, kode 016, Vanderbijlpark, vir verdere besonderhede.

### STAAK DIE GEKEKKEL:

Sê dit liever met blomme. Blomme betuig liefde, inspireer, frons, sê dankie. Al wat jy moet doen, is om jou gesig by die geleentheid te laat pas. HUIS EN TUIN het die blomme, kom soek jou sêgoed by ons, Tomstraat, Potch.

### TROUKAARTJIES:

Ons het, letterlik, eenduisend-voorbeelde van troukaartjies en bybehore vir daardie mooiste dag in u lewe. Ons nooi u om gerus ons katalogus te kom deurkyk, sodat u die heel beste keuse kan maak. Ons verseker u van persoonlike aandag en sal graag u vrae beantwoord. Skakel enige tyd! Tel. 24574.

### WEES IN DIE MODE:

Skep jou eie uitrustings met 'n Eina, ons gratis lesse, raad en hulp. Santam-deurloop, Potch, Tel. 5412.

### TIKWERK:

Tikwerkartef. Enkeleerl - A4 - R1,00 (tikpapier ingesluit). Een en 'n half - A4 - R0,75 (tikpapier ingesluit). Tik van wasvelle: R0,75 (wasvelle uitgesluit). Kontak mev. M. Myburgh, Gypsumstraat 15, Carletonville, Tel.: 01491 - 2850.

## KORTSPORT

### WATERPOLO:

Woensdag 28 Maart het die waterpolo koshuisliga reeds begin. Klooster en Hombré is die twee koshuise wat eerste teen mekaar gekompeteer het. Die belangstelling van al die koshuise is egter nie so goed nie, want tot op hede het nog net vyf koshuise ingeskryf vir die liga. Spanne wat deelneem is: Klooster 1 met M. Loots as kaptein; Klooster 2 met W. du Plessis as kaptein; Hombré met H. van Aswegen as kaptein; Over de Voor met Jan Pretorius as kaptein en 'n uitnodigingspan met Charl Meyer as kaptein. Al die wedstryde word beslis oor twee helftes van vyf minute elk.

### KOSHUISRUGBY:

Die koshuisliga begin Saterdag 31 Maart op die Fanie du Toit sportterrein om ongeveer 10h00 vm. Kwaa medededinging kan hierdie seisoen verwag word en Caput kan seker wees dat dit nie te maklik gaan wees om die kroon te behou nie. Menige koshuise sweer nou al wraak vir loesings wat hul verlede jaar moes verduur het. Die sportredaksie wens alle spanne sterkte toe.

### TRAPKAR:

Die bal is reeds aan die rol met die jaarlikse trapkar-kampioenskap. Die onderskeie koshuise oefen al reeds lankal en die manne is al goed fiks. Die kampioenskap begin Saterdag 31 Maart op Kierksdorp.

### MUURBAL:

Saterdag 24 Maart het die PU-muurbalklub 'n geslaagde kursus met Mike Simmons as afrigter aangebied. Daar word beoog om meer sulke kursusse aan te bied om sodoende alle onaktiewe sportmense te betrek. Daar word alreeds Maandae en Woensdae oefenklieke vanaf 19h00 by die LO-departement aangebied. Beginners kan Saterdag vanaf 09h00 tot 11h00 by die

bane oefen. Ledegelde beloop tien rand en kan by die sportkantoor betaal word.

Wedstryde vir die komende week is soos volg: Derde liga: Woensdag 4 April, Pukke vs PBHS, PU-bane. Pukke B vs Vaal Reefs, PU-bane

### TENNIS:

Uitslae van die PU-kampioenskap tot dusver is soos volg:

Fanie Campher wen Johan Strauss by verstek; In die dames enkelspel het Wilma Marx 'n oorwinning van 6-1, 6-3 oor Janne Fourie behaal. Sy het ook vir Marina Smith met 7-5 en 6-4 geklop. Magda Smuts het ook vir Barbara du Busson gewen met 6-4 en 6-2. In die damesdubbelspel het Elbie Kruger en Mariëtte Schoonraad vir Hendrika en Helena Louw geklop met 'n telling van 6-0, 6-0. Janne Fourie en Brenda Pretorius het 'n wedstryd by verstek gewen oor Gene Fourie en Marina Smit.

### VELDLOOP:

Die Muskadel-velde-wedloop vind Saterdag 21 April op Montagu plaas. Dit word deur die Westelike Provinsie se veldloop-unie georganiseer.



Ndaba Barnard van die PU op pad na hoër hoogtes.

Willie Smit van die GOK wan die 100m vir mans in 'n tyd van 10,2s, met Greg Collin van UPE in die tweede plek en Andele Mkatishwa van Wes-Driefontein in die derde plek.

